



Inatsisartut Sanaartornermut Ataatsimiititaliaat  
/ maani

05-11-2020  
Suliaq nr.: 2020 - 2673  
ID nr. 58367354

**Illuliortiternermi sanaartornermilu neqerooruteqartitsisarneq pillugu Inatsisartut inatsisaata allanngortinneqarnissaanik siunnersuut (UKA 2020/23) pillugu ataatsimiititaliap apeqquteqaataanut akissutit**

Postboks 909  
3900 Nuuk  
Tlf.: (+299) 34 50 00  
E-mail: box909@nanoq.gl  
Fax: (+299) 34 63 56  
www.naalakkersuisut.gl

Inatsisissatut siunnersuutip matuma siuliani taaneqartup suliarineqarneranut atatillugu Sanaartornermut Ataatsimiititaliaq allakkatigut apeqqtunik, 3. november 2020-mi ulluleneqartunik saqqummiussaqaarpoq, taakkulu siunnersuummi imm. 6-imut, siumoortumik nalunaaruteqartarneq pillugu kapitalimik nutaamik imaqartumut tunngasuupput.

Tamanna tunngavigalugu Naalakkersuisut kapitalimi pineqartumi aalajangersakkanut tunngaviusut siunertaasullu pillugit isummersuutinik aallarniutaasunik tamanullu tunngasunik saqqummiussinissamut periarfissarsipput.

Siumoortumik nalunaaruteqartarneq kalaallit inatsisaanni nutaaliorteruvoq. Aamma siumoortumik nalunaaruteqartarnermut maleruagassat ilusiligaanerat neqerooruteqartitsisarnermut aalajangersakkanut, nunani amerlanertigut uatsinnut assersuuttakkatsinni ilisimaneqartunut naleqqiullugu nutaaliorterupput.

Siumoortumik nalunaaruteqartarnerit pillugit aalajangersakkat siunnersuummi immikkoortumut 4-mut atalluinartutut isigineqassapput, taakkulu malillugit najukkani entreprenørit kisimik neqerooruteqarnissaat naatsorsuutigineqarsinnaatillugu, killilimmik suliariumannittussarsiuussisoqarsinnaavoq, aamma siunnersuummi immikkoortoq 5, suliffeqarfiit taamaallaat pingasut tikillugit amerlassusillit illuliassanik sanaartugassanillu sanasinnaappata neqerooqqusineq atorneqarsinnaavoq, tak. siunnersuummi § 25 a, imm. 4.

Siumoortumik neqeroortitsinertaqanngitsumik neqerooqqusinertaqanngitsumillu killilimmik suliariumannittussarsiuussinissamut aalajangersakkat nutaat taakku taamaallaat atorneqarsinnaapput, siumoortumik nalunaaruteqarnissamut maleruagassat malillugit suliasamut neqerooruteqartitseriaasissamullu kaammattuisoqarsinappat.

Naliliinerup, siumoortumik neqeroortitsinertaqanngitsumik neqerooqqusinertaqanngitsumillu killilimmik suliariumannittussarsiuussinissamik aalajangiinnermut tunngavigineqartup pissusiviusunit allaanerusinnaanera tamatumunnga peqqutaavoq. Killilimmik suliariumannittussarsiuussinissamut siumoortumik nalunaaruteqartoqarnerani entreprenørip najugaqavissuunngitsup suliasamut soqutiginnilluni saaffiginnissutaanik takkuttoqarpat, tamatuma kingunerisaanik neqerooruteqartitsinissaq tamanut ammasumik

saqqummiunneqassanersoq neqerooruteqartitsisup eqqarsaatigeqqissavaa, najukkami entreprenørit kisimik suliassamut neqerooruteqartinneqarnissaannut tunngavissaq nalorninarloq immaqalu kukkusuusoq paasinarsisinnaammatt. Kisiannili entreprenørip illoqarfiup avataaneersup saaffiginnissutaa naammattumik pimoorusaasutut isikkoqanngitsoq isumaqarfigineqarani siumoortumik neqeroortitsinertaqanngitsumik killilimmik suliariumannittussarsiuussinissaq aalajangiusimaannarpagu, entreprenøri pineqartoq siumoortumik nalunaarutip tamanut ammasumik saqqummiunneqarneraniit sapaatit akunneri sisamat qaangiutsinnagit neqerooruteqartitsinerup ilusaa pillugu maalaaruteqarsinnaavoq, tak. siunnersuummi § 25 a, imm. 6. Siunnersuummi § 25 a, imm. 6 neqeroortitsinerpiamut tunngasuunngilaq, kisiannili taamaallaat siumoortumik nalunaaruteqartarnermut tunngasuulluni.

Neqeroortitsinerpiamut (neqerooqqusinermut imaluunniit siumoortumik neqeroortitsinertaqanngitsumik killilimmik suliariumannittussarsiuussinermut) tunngatillugu maalaaruteqartarnermut, aamma pisortat pisiniartarnerannut neqerooruteqartitsisarnermut maalaaruteqartarfik pillugu Inatsisartut inatsisaanni piffissap maalaaruteqarfiusussap naatsorsorneqartarneranut aalajangersakkat nalinginnaasut atuutissapput.

Entrepreneørit sanasullu soqutiginnittut neqerooqqusilluni imaluunniit siumoortumik neqeroortitsinertaqanngitsumik killimmik suliariumannittussarsiuussilluni isumaqatigiissuteqartoqarsimaneranut ilisimasaqartariaqannginnerat tunngavilersuutigineqarsinnaavoq. Kisiannili neqerooruteqartitsinermik taamaattumik ingerlatsisoqarnissaata siunnerfigineqarnera pillugu siumoortumik nalunaaruteqartarnermi suleriaatsimi § 25 a-mi allaaserineqartumi soqutiginnissinnaasut pisuni allani, siumoortumik neqeroortitsinertaqanngitsumik killimmik suliariumannittussarsiuussinermik atuiffiusuni, imaluunniit neqerooqqusilluni neqeroorummik pissarsiniarfiusuni suliap ingerlanera pillugu paasisaqarnissamut periarfissaat pitsaanerulersinnaapput. Maleruagassat atuuttut naapertorlugit siumoortumik neqeroortitsinertaqanngitsumik killimmik suliariumannittussarsiuussineq ingerlanneqarsinnaavoq, neqerooruteqartitsisoq isumaqarpat, entreprenørit aalajangersimasut kisimik suliassap suliarinissaanut naammattunik piginnaasaqartoq, imaluunniit immikkut ittunik pisariaqartitsinneqartunik ilisimasaqartoq. Neqerooruteqartitsisoq taamaattoqartoq isumaqarpat, neqerooruteqartitsisup maleruagassat naapertorlugit tamanut ammasumik saqqummiussinertaqanngitsumik neqerooruteqartitsineq ingerlassinnaavaa. Tamanna aamma neqerooqqusinermi, soorlu neqerooruteqartarnermut inatsimmi maanna atuuttumi § 20, imm. 1, nr. 4 naapertorlugu ingerlanneqartumi, neqerooruteqartitsisup suliffeqarfiup aalajangersimasut kisimi suliassaq naammassisinnaagaa isumaqarfigippagu, imaluunniit nr. 5 naapertorlugu tunngavissat immikkut ittut allat entreprenørip aalajangersimasup toqqarneqarnissaanut pingaaruteqarpata atuutissaq.

Siunnersuutip ilusilernerneqarnerani ersarissumik ersittumillu pissuseqarnissaq, aammalu entreprenørip neqerooruteqartitseriaatsinik killilinnik atuinermi piumasaqaatit naammassineqarsimanngitsut isumaqaruni qisuariarnissamut maalaaruteqarnissamullu periarfissaqarnissaa immikkut ittumik pingaartinneqarpoq.

Illuatungaagut neqerooruteqartitsinerup naapertuuttumik ingerlanneqarnissaa, aammalu suliassap killilimmik neqerooruteqartitsivigineqarnissaanik siunnerfeqarnermik nalunaaruteqarneq pillugu maalaaruteqarnissamut piffissarititaasumik aalajangersaasoqarnissaa pisariaqartutut naliliiffigineqarpoq.

Neqerooruteqartitseriaaserpiaq pillugu maalaaruteqarnissamut piffissarititaasoq kingusinnerusukkumiit, soorlu entreprenørimut sanasumulluunniit toqqarneqartumut isumaqatigiissuteqarnermiit aalajangerneqassappat tamanna suliap ingerlaneranut naapertuutinningsorujussuussaaq, aammalu aningaasaqarnikkut annaasinnaasat amerlinerinik kinguneqarsinnaalluni. Tamanna aamma maalaaruteqartup piffissaagallartillugu maalaaruteqarsinnaanerata qulakkeerneqarnissaanut annikillisisissaaq, neqerooruteqarsinnaasoq, maalaaruteqarnissamik kissaateqartoq piffissaq isumaqatigiissusiorfiusoq pillugu ilisimasaqartariaqartussaannngimmat.

Siunnersuummi § 25 a, imm. 4-mi soqutiginnittunik neqerooruteqaqqusisarnerup atuutinneqalerneranut tunngavilersuut pingaarutilik tassaavoq, neqerooruteqartitsisup taamaalilluni killilimmik neqerooruteqartitseriaatsimut piumasaqaatit atuunnersut naliliiffiginissaannut periarfissaqarnissaa. Tassalu suliassamut, neqerooruteqaqqusinissamik siunertaqarfiusumut ataatsimut sisamat amerlanerusulluunniit neqerooruteqarnissamut soqutiginnillutik nalunaaruteqarpata, taassuma ingerlanera pingaarnertut tassaasariaqarpoq, neqerooruteqartitsisup tamanut ammasumik suliariumannittussarsiuussinermik toqqaanissaa. Taamatuttaaq siumoortumik neqeroortitsinertaqanngitsumik killimmik suliariumannittussarsiuussinermi entreprenørimik illoqarfiup avataaneersumik soqutiginnittoqarpat, suliassap taassuma aamma tamanut ammasumik suliariumannittussarsiuunneqarnissaa orniginarnerussaaq.

Aalajangersakkamut tunngavilersuut pingaarutilik alla soqutiginnissinnaasut kukkusumik tunngaveqarluni taamaaliortoqarneranik isumaqartut neqerooruteqartitseriaaseq pillugu maalaaruteqarsinnaaneranut tunngasuuvoq.

Sanasut entreprenørillaunniit § 25 a, imm. 4 naapertorlugu suliassamut soqutiginninnerminnik takutitsisut tassunga neqerooruteqarnissamut inatsisitigut piumasaqarsinnaanissaat siunertaanngilaq.

Assersuutigalugu oqaatigineqassaaq, maanna maleruagassani atuuttuni illuliassat sanaartugassallu katillugit 500.000 koruuninik taakkuluunniit inorlugit nalillit neqerooruteqaqqusilluni suliariumannittussarsiuussinissaa akuerineqarmat, taamaattorli neqerooruteqaqquneqarlutik neqerooruteqartut amerlanerpaamik pingasuussapput. Neqerooruteqartitsinermi ataaseq, marluk pingasulluunniit neqerooruteqaqquneqassanersut neqerooruteqartitsisup aalajangissavaa, tassani sanasut/entreprenørit suliassamik naammassinnissinnaasut arlaqarnerat neqerooruteqartitsisup ilisimagaluarpaguluunniit. Taamatuttaaq neqerooruteqartitsinermi illuliassamut sanaartugassamullu, annertussuseq, pitsaassuseq piffissaliussarlu eqqarsaatigalugit neqerooruteqartitsinermut tunngavissani ajornakusoortorujussuarmik aalajangiiffigineqarsinnaasumut ataaseq, marluk pingasulluunniit neqerooruteqaqquneqassanersut neqerooruteqartitsisup nammineerluni aalajangersinnaavaa, tak. neqerooruteqartarnermut inatsimmi § 20, imm. 1, nr. 2. Aamma tassani sanasut/entreprenørit soqutiginnissinnaasut tamarmik neqerooqquneqarnissaat piumasaqaataanngilaq.

Suliffeqarfik sunaluunniit siumoortumik nalunaaruteqarneq tunngavigalugu soqutiginninnerminik nalunaaruteqartoq neqeroornissamut inatsisitigut piumasaqarsinnaassappat, tamanna neqerooruteqartitsisarnermut inatsisit iluanni tunngavissanik nalinginnaasunik uniuertertut isigineqassaaq. Tamatuma saniatigut inatsisitigut isumannaassuseq aamma assigiimmik pinnittarnissamut tunngavissat eqqarsaatigalugit eqqarsarnartoqarpoq.

Matuma kinguliani apeqqutinut saqqummiunneqartunut tulleriinneri malillugit Naalakkersuisut akissuteqaataat saqqummiunneqarput:

***Apeqqut 1. Siunnersuut ilusimisut iluseqartillugu neqerooruteqartunik naligiisitsineq qulakkeerneqanngitsoq Naalakkersuisunit isumaqatigineqarpa?***

*Akissut:* Naalakkersuisut isumaat malillugu siunnersuut ilusimisut iluseqartilluni neqerooruteqartut akornanni assigiimmik pinnittarnermik, neqerooruteqartitsisarnermut maleruagassat atuuttut malillugit siumoortumik neqeroortitsinertaqanngitsumik neqerooqqusinertaqanngitsumillu killilimmik suliariumannittussarsiuussinermi isiginiagassatut pitsaatigisunik – pitsaanerunngikkunik – imaqartoq. Naalakkersuisut isumaqarput, assigiimmik pinnittarnissaq naammattumik toqqissisimanartumillu annertussuseqartut, kinaassusersiunngitsumik assigiimmillu pinninnissamut maleruagassat tamanut atuuttut aqputigalugit qulakkeeriffigineqartut, tak. neqerooruteqartarnermut inatsimmi § 7, imm. 3.

Suliffeqarfik siumoortumik nalunaaruteqartoqarneranut atatillugu soqutiginninnerminik takutitsiiniarnermini, suliffeqarfiup illuliassamut sanaartugassamullu neqerooruteqarnissamut inatsisit tunngavigalugit piumasaqarsinnaanissaa Naalakkersuisunit eqqarsarnartoqartinneqarpoq. Tamanut ammasumik suliariumannittussarsiuussinerni neqerooruteqarnissamut piumasaqaatit minnerpaaffissaat nalinginnaasut saqqummiunneqartarput, taakkunungalugu ilanngullugu neqerooruteqartup 100.000 koruunit sinnerlugit pisortanut akiitsoqannginnissaata piumasaqaatigineqartarnera nalinginnaasuvoq. Tamatuma saniatigut neqerooruteqartup aningaasaqarnikkut akiliinnaassuseqarnissaanik neqerooruteqartitsisup qulakkeerisinnaanissaa kissaatigineqarpoq, neqerooruteqartoq qularnaveeqqusiinissamut uppernarsaasartussaammat. Soorunami piumasaqaatit taamaattut siumoortumik nalunaaruteqarnermi saqqummiunneqarsinnaanngillat. Taamaalilluni suliffeqarfiup, pisortat suliaasaataannik tunineqarnissamut piumasaqaatit minnerpaaffissaanik naammassinnissinnaanngikkuni neqerooruteqartunut ilaatingitsoorneqarsinnaanissamut periarfissaqanngitsoornissaa annertusissaaq.

***Apeqqut 2. Siunnersuut ilusimisut iluseqartillugu neqerooruteqarnermi maalaaruteqarsinnaanermut periarfissanik killiliisoq Naalakkersuisunit isumaqatigineqarpa?***

*Akissut:* Naalakkersuisut isumaqarput, siunnersuut ilusimisut iluseqartilluni neqerooruteqarnermi maalaaruteqarsinnaanermik pitsannguiffiusoq. Maleruagassat atuuttut malillugit siumoortumik neqeroortitsinertaqanngitsumik neqerooqqusinertaqanngitsumillu killilimmik suliariumannittussarsiuussinissamut soqutiginnissinnaasut taamaallaat tunniussinissamut aalajangiineq pillugu maalaaruteqarnissamut periarfissaqarput. Tunniussineq pillugu aalajangiinernut maalaaruteqarsinnaatitaaneq siunnersuummi allanngortinneqanngilaq.

Siunnersuut soqutiginnittut suliaasap siumoortumik neqeroortitsinertaqanngitsumik neqerooqqusinertaqanngitsumillu killilimmik suliariumannittussarsiuunneqarnissaanik siumoortumik nalunaarut pillugu maalaaruteqarsinnaanerannut tapiliussamik ilaneqarpoq.

Ataatsimut isigalugu maalaaruteqarsinnaaneq annertusineqarpoq.

***Apeqquut 3. Neqerooruteqarnissamut soqutiginnittunik tamanik neqeroortitsineq naligiisitsinermik qulakkeerinnissasoq Naalakkersuisunit isumaqatigineqarpa? Siumoortumik nalunaaruteqartarnissaq tunngavigalugu amerlanerpaamik pingasut neqerooruteqartut pineqarput.***

*Akissut:* Sanasut/entreprenørit suliassamut soqutiginninnerminnik saqqummiussisut tamarmik neqerooruteqarquneqarnerini, nalinginnaasumik assigiimmik pineqarnissamut qulakkeerinniffigineqartassasut Naalakkersuisunit isumaqatigineqarpoq.

Tamatuma peqatigisaanik suliffeqarfiiit pisortanik amerlasuunik akiitsullit, imaluunniit suliffeqarfiiit qularnaveeqqusiinissamut aningaasaqarnikkut piginnaanikinnerusut neqerooruteqarnissamut inatsisitigut piumasaqarfigineqarnissaat ilimanaateqarpoq.

***Apeqquut 4. § 25 a, imm. 5 allangortinneratigut naligiisitsineq qulakkeerneqarsinnaava., taamaalilluni 'sinnaavoq' 'sussaavoq'-mik taarserlugu oqaaseqatigiillu 'tamatumani saniatigut inatsisitigut piumasaqaateqarsinnaannginnerat' peerlugu?***

- a. Neqerooruteqartitsinermi allaffissornikkut annikinnerusunik aningaasartuuteqartoqalerneranik malitseqarnissaa Naalakkersuisunit isumaqatigineqarpa?***

*Akissut:* Neqerooruteqartut akornanni assigiimmik pinninnissaq matuma siuliani taaneqartoq apeqqummi allaaserineqartutut anguneqarsinnaasoq Naalakkersuisunit isumaqatigineqarpoq. Tassunga tunngatillugu Naalakkersuisut isumaqatigaat, allanguineq neqeroortitsinermi allaffissornermut aningaasartuutit amerlanerulernerinik kinguneqassanngitsoq.

Kisiannili matuma siuliani eqqaallatsiarneqartutut, neqerooruteqarnissamut soqutiginnittut tamarmik inatsisitigut taamatut piumasaqarsinnaanerat eqqarsarnartoqartinneqarpoq, taamatullu inatsisitigut piumasaqarsinnaaneq tunngavissanut, maleruagassani atuuttuni siumoortumik neqeroortitsinertaqanngitsumik neqerooqqusinertaqanngitsumillu killilimmik suliariumannittussarsiuussinissamut nammattuusunut tamakkiisumik naapertuuttutut isigineqanngillat. Matuma siuliani oqaaseqaatinut, tamanut itisiliiffiusunut innersuussisoqarpoq.

***Apeqquut 5. Apeqquutit sisamaanni siunnersuutigineqartunut unammilligassanut Naalakkersuisut allanik aaqqiissutissanik takusaqarsinnaava?***

*Akissut:* Naalakkersuisut isumaqarput, siunnersuut allangortinneqassappat, taamaalillunilu neqerooruteqartut soqutiginninnerminnik nalunaaruteqartut tamarmik neqerooruteqarnissamut inatsisitigut piumasaqarsinnaasunngorlugit siunnersuut allangortinneqassappat, apeqqut 4-mi aaqqiissutissatut innersuunneqartoq ilaneqartariaqartoq, taamaalillunilu soqutiginnittut pineqartut ilaatigut ukuninnga ilanngussillutik nassiussisassasut,

- Akileraartarnermut Aqutsisoqarfimmiit nalunaarut, pisortanut amerlasuunik akiitsoqannginnermut uppersaataasoq, ilaatigut
- aningaaserivimmit assigisaannillu nalunaarut, pineqartup suliassap suliarinissaanut qularnaveeqqusiinnaaneranik naliliiffiusoq.

Kingulliullugu taaneqartoq immikkut ittumik unamillertitsisinnaavoq, neqeroorummut aningaasartassarititaasut amerlassusissaat ilisimaneqartussaangimmat, taamatullu suliassat suliarineqarnissaanut piffissaq ilisimaneqartussaananani. Aamma tassunga tunngatiglugu erseqqissaatigineqassaaq, neqeroorummut aningaasartassarititaasut imaluunniit suliassami missingersuutitut sinaakutissat amerlassusissaat pillugit paasissutissiineq marlunnt avitanik aningaasaliisarnermut uniuummat.

Taamatut nalunaaruteqarnissamut piumasaqarneq qularnanngitsumik neqerooruteqarnissamut soqutiginnissinnaasut arlallit soqutiginninnerminnik nalunaaruteqanngitsoortarnerinik kinguneqartussaavoq, suliassaasinnaasunut piffissami siusissumi tassani tamanna ajornakusoormat.

Naggasiutigalugu ataatsimiititaliaq inatsisissatut siunnersuummik peqqissaarussilluni suliagarneranut, aammalu siunnersuutip imaanik itisiliinissamut periarfissinneqarnermut qutsavigaara.

Inussiarnersumik inuulluaqqusillunga



Karl Frederik Danielsen